

東
華
續
錄

東華續錄

乾隆一百十一

臣王先謙敬編

臣周壽蕃恭校

乾隆五十五年庚戌春正月壬午朔以 八旬萬壽頒詔天下○
普免天下錢糧○甲申諭朕爲皇子時於雍正五年大婚自毓慶
宮遷居西二所踐阼之後升爲重華宮其後漸次將四五所構爲
建福宮敬勝齋等處以爲幾餘遊憩之地建置規模已極美備無
可復加臨御五十五年以來仰荷 昊蒼眷佑壽臻八袞五代同
堂是重華宮等處實爲興祥所自卽歸政以後亦尙思年節重臨
奉時行慶世世子孫惟當永遠奉守所有宮內陳設規制亦應仍
循其舊毋事更張若皇子皇孫果能善體朕懷謹守此訓幾暇優
游年節行慶傳之奕禩實爲朕所深願至東所內爲年少皇子皇

孫公共所居隨侍內監等住屋亦在此內率無隙地矣若照重華宮之例另行興建不特宮牆四圍別無空隙之地可以拓展且亦非朕垂示後昆之意自不如一循此時舊制之爲善也著將此旨交上書房敬謹存記俾我萬世子孫永遵無斁○諭軍機大臣等前以黎何曾經臣事黎氏不以盛衰爲去就心迹尙可矜原節次降旨令福康安平心詢問其來意如何並著將黎何等四人派員送京另行酌量辦理復令孫士毅將黎何果否言過其實詳晰具奏今據孫士毅覆奏黎何始以虛詞聳聽繼復藉病推辭假公報怨居心實爲險詐近見阮光平歸順天朝撫有安南全境無處逃匿窮蹙內投藉稱繫懷故主假託忠義之名希冀天朝爲之別圖舉事其意以黎維祁柔懦無能若一旦復國不過視爲綴旒彼得逞其私謀以成己事故於福康安前不得不盛稱安南黎氏舊臣

義士情願效力復仇諒山江北等處有兵三四萬屯聚張大其詞
搆毀滋事其狡猾伎倆尤不可問福康安孫永清接奉前次諭旨
後自必卽派妥員解送進京見又令軍機大臣札諭該委員沿途
小心管押迅速送京將此諭令知之○丙戌廣西巡撫孫永清奏
據左江道湯雄業稟稱阮光平於十二月十二日行抵鎮南關遣
陪臣阮文名吳文楚率衛士等於十三日至昭德臺下祇領敕印
並據吳文楚等稟稱國王擇於三月內赴京恭祝 萬壽文楚願
隨同行早速瞻覲謹將國王奏謝表文進呈硃批表文曰欣悅覽
之卿所使陪臣適至卽交彼持回卿閱朕硃批益當歡喜相見在
卽同此殷念也諭軍機大臣等孫永清所進阮光平謝表朕已用
硃筆於表內批示該國使臣阮宏匡等見已到京俟其回國時將
硃批表文交令齎往宣諭以示寵眷至吳文楚係該國得力之人

隨同赴闕未免居守無人降旨令阮光平自京回國後遇下次進貢之期再行來京該國王呈遞孫永清稟帖內亦稱懷遵聖旨著吳文楚居守國都今吳文楚復向湯雄業懇請同來瞻覲該撫自當仍遵前旨諭以大皇帝俯念爾國新造藩封特加體恤國王赴京後令爾居守國中以資鎮撫爾自當暫緩進京著該撫卽遵旨宣諭吳文楚俟其具文呈覆卽行迅速馳奏○戊子諭回子公額色尹病故可憫著加恩賞銀三千兩以襄喪事仍交該院照例致祭額色尹從前雖無勞績於一切官差奮勉多年伊公爵並非軍功所得乃特恩所賜見在出缺例應降襲念額色尹歸順有年著加恩將伊公爵仍令伊子喀沙和卓承襲圖都從前出缺伊公爵亦應降襲朕曾加恩令託克託承襲託克託襲爵後甚屬疏懶今喀沙和卓業經襲公託克託係喀沙和卓之子著作爲一等台吉

○辛卯諭軍機大臣等阮光平祇受封爵疊荷殊恩本年躬詣闕
廷祝釐瞻覲實屬出於至誠俟該國王到京時欲令行抱見禮以
昭優異該國王初次入覲未諳天朝體制福康安於其進關後告
以此次進京祝嘏大皇帝深爲嘉予國王到京朝見時大皇帝欲
令國王行抱見請安之禮此係逾格施恩天朝大臣內懋著勲勞
者始能膺此異數其餘雖親貴大臣亦所難得今國王邀此隆禮
實爲希有寵榮至黎維那及伊屬下人等來京歸入漢軍旗下編
一佐領昨降旨令福康安等酌加分別將黎氏支屬親戚及曾任
官職者約在八十戶以內分起送京但各戶人口多少不一見在
查明京城隙地起蓋房屋約可蓋二百二十間自應就房閒數
目定人數之多寡著傳諭福康安等卽酌覈各戶人口以每人住
房三間而論此二百餘間可容若干人口卽行按數送京不必拘

定八十戶致滋擁擠○壬辰諭大學士和珅著加恩賞給黃帶四
開襖袍固倫額駙豐紳殷德著兼散秩大臣行走○諭據成林面
奏阮光平所用衣服冠帶已命如式製造俟其來京賞給惟該國
王在國所繫之帶係屬紅鞋今欲加賞金黃鞋帶以昭優異福康
安於其進關後應告以此次進京祝嘏大皇帝於國王到京朝見
時特賜金黃鞋帶天朝體制惟宗藩始得繫用此帶今國王特膺
異數比於親藩實爲難覲寵榮國王赴京應仍繫用紅帶恭候到
京面覲時大皇帝加恩賞換如此詳悉告知阮光平自必益感逾
格恩施有加無已之至意○乙未諭軍機大臣等明亮等奏從前
察喀爾西雅克部落阿哈拉克齊占頗拉特等將前來貿易之安
集延回人及喀什噶爾回人等馬匹奪取千餘匹一案今經博斌
等將占頗拉特及其子伯爾克並塔爾巴噶什之布嚕特阿哈拉

克齊玉默特拏獲分別辦理等語所辦尙妥布魯特等互相劫掠
雖係伊等常事似此會合多人奪取貿易回人馬匹至于餘匹之
多者亦所罕有若不懲辦恐別滋事端明亮等乘其不備遣兵將
占頗拉特等拏獲實屬可嘉明亮伊斯堪達爾著各賞珊瑚朝珠
一串大荷包各一對小荷包各四箇博興著賞大荷包一對小荷
包四箇博斌著賞大段二匹大荷包一對小荷包二箇其隨往之
布魯特比回子等亦各奮勉充巴噶什部落之布魯特比玻什輝
著賞給二品頂帶齊哩克部落之布魯特比呼圖魯克著賞大段
一匹齊哩克部落之布魯特阿哈拉克齊庫楚克著賞給六品頂
帶希布察克部落之布魯特比多連之弟色提巴爾第著賞給五
品頂帶花翎多連之子圖爾第愛勒推著各賞大段一匹充巴噶
什部落之布魯特華特著賞戴花翎瑄齊著賞五品頂帶花翎伊

斯堪達爾之姪瑪捫著賞二品頂帶呼圖魯克都斯著賞三品頂帶布魯特岳勒達錫列丕野斯托里雅什曲魯曲俱著賞戴金頂以示鼓勵占頗拉特之子伊第哩呼里等懇請緝送賊犯以贖其父明亮等未將占頗拉特辦理暫候亦是著將占頗拉特妥爲看守伊子果能緝賊送到時再辦或送京師安插臨期酌量妥辦如此既可絕其根株各布魯特知所畏懼竊盜之案自必稀少巴斯起斯比等各派阿哈拉克齊與博斌引路俱應加恩著寄諭明亮查明每人賞段一匹以示鼓勵○丙申 御定重排石鼓文十章刻石鼓於太學及熱河 文廟○丁酉廣西巡撫孫永清奏安南國王阮光平接受國印及賜詩具表陳謝並備貢物遣陪臣齎呈計正月下旬抵關又該國王與陪臣阮宏匡等書信臣閱其情節因從前與暹羅構兵恐干詰詢令阮宏匡據實陳奏合於恭順之

義書內並因伊母年高令陪臣購買人護以爲奉親之寶謹將原書由驛呈進諭軍機大臣等阮光平祇領印信詩章倍深感激遣使具表呈貢係出至誠見在朕於二月初八日起鑾巡幸山東計該陪臣等於正月下旬進關起程到京日尙需時日著傳諭該撫計算日期或令該貢使等於朕駐蹕泰安及行抵曲阜時卽在該處瞻覲固屬甚善儻不能如期趕赴則竟俟朕於四月十六日回鑾後令該貢使等在京瞻仰另行酌予宴賚亦無不可此次該貢使等總令按站略速行走不必再似前次之趨程太速致多勞頓也又據奏稱阮光平見在寄信與陪臣阮宏匡等令將暹羅與安南構釁緣由據實陳奏並將原書進呈等語見在暹羅與安南使臣同赴闕廷共與筵宴幾及兩旬彼此並未提及從前起釁緣由亦並無些微形蹟朕亦未經垂詢見將該國王所寄原書交與正

使等閱看並因伊國母年高賞給人漢一斤繕寫敕書並前此硃批表文先行發去該撫接奉後卽委員齎赴鎮南關交該國鎮目轉遞阮光平收受該國王自當倍深欣感賜安南國王阮光平敕諭曰廣西巡撫孫永清奏國王與左江道湯雄業書內稱阮光顯等同國備述瞻覲闕廷疊邀寵錫惟有進京祝釐伸悃見在修表進貢謝恩至陪臣阮宏匡等於鉦節前到京與諸國藩王使臣同與筵宴內暹羅國與安南曾經構釁恐奉垂詢特寄信與陪臣令其據實陳奏等語並據巡撫孫永清將國王寄阮宏匡等原信進呈披閱之下深爲嘉予國王備列藩封疊膺寵眷感激欣抃具見悃忱所寄陪臣之語令其一切據實陳奏朕甚嘉之至國王節次恭遣陪臣奉表進貢不絕於道今年三月內復親詣闕廷祝釐伸悃足徵傾心向化事大情殷至因陪臣阮宏匡等到京正值新年

宴資外藩之時與各國使臣齊與慶宴其中暹羅一國與安南會
經構釁稱兵恐彼國使臣巧言媒孽令阮宏匡等於垂詢時據實
陳奏尤見國王抒誠效盡一切無疑實如家人父子恪事小心但
朕宴資外藩時萬國朝正共球畢集如朝鮮琉球暹羅廓爾喀等
國無不普錫慶筵同霑闡澤暹羅使臣與爾國使臣雖共列朝班
典儀肅穆無由交接語言况外藩部落渥荷龍光均爲屬國朕從
來撫馭中外一視同仁屬國陪臣斷不敢以國中私事上瀆聽聞
暹羅使臣與爾國使臣既相忘無事天朝體制亦未嘗特加垂問
各國私事也又國王寄阮宏匡等信內稱國王之母年登八十氣
體稍衰願得上好人養以供饋粥令阮宏匡到京時多方採買隨
便寄回一節國王因今春入覲祝釐萬里遠行暫違定省令陪臣
購買人養以供奉養足見國王旣殷瞻覲之誠復切晨昏之念實

爲忠孝兼全深可嘉尙茲用特賜人參一斤以資卿母高年補益
若交阮宏匡等齋回恐於國王起程之前未能趕到特由驛報交
巡撫孫永清委員齋赴鎮南關交爾國鎮目轉遞國王收受自可
早慰娛親之意國王更可乘此春融風日暄和緩程入覲承受朕
格外恩施又國王前次奏謝賞賜朝珠荷包表文情詞肫懇朕親
爲批答卽交阮宏匡等齋回今亦附報發去俾國王早悉朕眷注
優厚爲外藩罕觀之事益當祇承嘉予倍篤忠忱仰副朕懷常膺
寵錫欽哉特諭○壬寅以阿精阿爲直隸按察使由刑部郎中遷○癸卯
諭軍機大臣等本年朕八旬萬壽安南國王阮光平赴闕祝釐先
至熱河瞻覲準於三月中自該國起身進關距八月萬壽之期尙
有數月該國王初入內地道路遙遠正值天氣炎熱之時自應緩
程前進不必過於趲行朕夏秋駐蹕熱河已定於七月二十六日

在萬樹園筵宴藩部八月初三日始行啓鑾回京著傳諭福康安
計算程期令阮光平於七月二十一二前抵熱河俾途中行走從
容不至勞頓以示朕體恤遠人至意○丙午吏部議工部侍郎德
成於駁減河南考城縣城工單銜具奏照例降級調用無級可降
應革職得旨此案德成獨出已見單銜具奏實屬任性乖張其咎
較重著降爲三品頂帶署理工部侍郎仍帶革職留任○辛亥諭
軍機大臣等涇渭爲關中八水之二向來有謂涇清渭濁者又有
涇濁渭清者迄無定說考之谷風詩云涇以渭濁解經者皆言涇
濁渭清涇未屬渭之時雖濁而未甚見由二水既合而清濁益分
然朕詳釋詩意蓋言涇水發源本清入渭以後其流不得不合而
爲濁是涇水因渭水而濁非謂涇水本濁也箋釋諸家似與經文
本義不合惟宋人蘇轍詩云袞袞渭河濁元人曹伯啓詩亦有涇

清渭濁源何異之句足爲證據因思二水皆在陝西境內秦承恩
係讀書人以今證古詳加履勘無難考據得實著傳諭該撫親赴
涇水渭水之各發源地方及二水合流之處確加察視是否涇清
渭濁抑眞涇濁渭清卽行繪圖貼說具奏尋奏查涇水發源甘肅
平涼竝頭山東至長武入陝渭水發源甘肅渭源鳥鼠山東至隴
州入陝二水至高陵縣合流臣察視涇水約寬一二十丈入陝後
併支流一十有四其流與江漢諸川相似渭水約寬七八十丈入
陝後併支流三十有三其色與黃河正同合流處涇北渭南一望
可辨七八里始溷爲一涇係石底四時常清渭係沙底四時常濁
並於急流各取水激之涇一石滓三升渭一石滓斗許臣以所目
驗並考之碑乘詢之士著涇清渭濁毫無疑義得旨覽奏具悉又
奏其源在甘肅俟臣查明具奏批其流旣清斷無其源反濁之理

不必往查矣

二月癸丑 上御經筵○諭軍機大臣等本日據富綱奏緬甸國
長孟阻敬備表貢遣使叩祝萬壽並欲求請封號其貢物象隻業
已齊備該國長定於一交新年齋潔告虔卽令貢使起身等語前
年該國長遣使輸誠敬納貢業經恩准內附賞資回國此次虔
備表貢遣使來京祝釐請封實係好事福康安聞之自必同深慶
幸著傳諭福康安俟阮光平進關後遇便告以緬甸國長見在亦
欲遣使赴闕虔備貢品恭祝萬壽求請封號皆由大皇帝統御中
外萬國輸誠是以荒服炎徼莫不傾心向化效悃來庭如此明白
告知阮光平自必踊躍歡忻益深傾向也○丙辰兩廣總督公福
康安奏查廣西各府安插黎維那等三百七十二名口遵旨詳加
酌覈內將黎維那黎維祓等六十一名口爲一起其丁廷衡潘啓

德阮廷沛潘孟賢等一十八名口分三起解送進京此外閉阮傑黃廷球阮賢阮廷連黃德鄧黎允俊閉阮玠段旺等二百三名口安置江南等省若於此數起內酌留粵西恐安南壤境毗連日久仍生事端自應全數解送編管又查解京人口除著名之人其餘各名下俱有弟兄親族可分爲數十戶編一佐領見京城建蓋房屋足資棲止報聞○己未 上啓鑾謁 東陵 西陵巡幸山東命 皇十五子同 皇十一子永理 皇十七子永璘隨行○免經過直隸州縣本年額賦十分之三○賜十世同居之甘肅固原州監生陳舜 御製詩章 御書扁額○壬戌 上謁 昭西陵 孝陵 孝東陵 景陵詣 孝賢皇后陵奠酒○丙寅廣直隸本年學額○戊辰諭朕披閱康熙年間 萬壽盛典恭載 聖祖仁皇帝六旬萬壽時各省老民多有來京慶祝者今朕壽屆八旬

普天同慶薄海臣民咸深忭舞朕恐外省文武大員紛紛籲請是以每省酌派二三員並令各帶道府丞若將備等官來京以遂其祝釐瞻覲之忱至各省耆民人等雖未降旨准其赴闕而草野情殷葵向思欲遠來效悃祝延萬壽者各省想亦不少朕思年老之人正須頤養長途跋涉未免辛勤或因不服水土偶生疾病轉非體恤高年之意不但外省地方道路遙遠不便前來卽順天直隸老民僻處鄉隅亦不必齊赴京師致滋勞頓前已於恩詔內令查明各省耆民資以粟布銀兩溥被恩施茲特再降諭旨著各督撫轉飭地方官出示曉諭凡欲來京慶祝之老民等俱著不必前來以副朕安老引年至意○庚午 上謁 泰陵 泰東陵○辛未諭前據巡城御史穆克登額等奏稱拏獲建昌縣盜犯王二等供出隨同馬十等行劫錢鋪一案此事已閱二年之久該省既將正

犯拏獲迄今尙未審辦完結殊屬遲延富尼善原係直隸臬司且曾爲熱河道員建昌縣是其所屬此案正伊任內之事乃以劫盜重情一任要犯狡展懸宕多年置不速結非尋常玩忽可比昨已降旨將該司交部嚴加議處富尼善著卽解任來京聽候部議所有安徽布政使員缺著和甯補授其四川按察使員缺著聞嘉言補授湯雄業著補授廣西按察使所遺廣西左江道員缺著黃符綵補授○免直隸各屬節年因災緩徵錢糧○癸酉諭軍機大臣等福康安前以木植一案罰繳養廉公俸在福康安受恩深重斷不因康俸已罰稍踰檢閑致有勒索屬員之事但此次帶領阮光平來京入覲途中盤費及一切需用必多著加恩賞給本年養廉銀八千兩卽於廣東藩庫支給以示體恤再阮光平定於三月內進關由粵進京福康安沿途照料與該國王一同行走如遇有賞

給福康安香器扇筵及奶餅等物亦必照撥賞給阮光平一分福康安具儀仗迎接時亦當與阮光平一同跪迎謝恩以見朕優待外藩與天朝大臣並無歧視其福康安途中陳奏事件奉到硃批亦不妨與阮光平閱看俾免心存疑慮且俾知朕辦理庶政親綜萬幾悉秉大公至正雖荒服遠人無不可使共見也將此由四百里傳諭知之○命截留南漕三十萬石貯北倉備用○甲戌諭建昌縣盜犯馬十等行劫錢鋪一案係乾隆五十三年二月之事既將首夥各犯提至省城自應卽行審辦乃案懸兩載至今尙未結案事關盜劫重情實非尋常延緩可比昨將馬十解至行在交軍機大臣嚴行審訊該犯係於上年十月內提解到省臬司飭委保定府知府審訊該府復交清苑縣知縣究辦該縣朱腹松僅提齊寬薛熱河兒李五三犯審訊轉置首犯馬十於不問且止將齊寬

等犯訊過一次並未覆行研鞠該督於此等重案任聽宕延並不嚴催完結臬司富尼善既提各犯到省又不親行提問僅委之知府辦理而該府復藉查賑爲名遞委首縣展轉稽延全不以事爲事直省吏治可謂廢弛已極見派乾清門侍衛慶成同軍機章京策拔馳赴保定省城將朱腹松革職鎮拏前來質訊其清苑縣知縣員缺卽著慶章前往署理劉峩已降旨同富尼善及承審各員交部嚴加議處著先行革去花翎黃褂俟定案時再降諭旨○丙子諭據畢沅等奏請以咸豐縣知縣陳元京調補江夏首邑一摺已批交該部議奏矣因思首府首縣係省會要區事務殷繁所關綦重必須實心辦事明幹有爲之人方足以資委任近來各省督撫往往以各員應對之閒口才便捷且或以酬應見長遂爾加之識拔調補首府首縣之任殊不知所用非人於地方要務必致廢

弛貽誤卽如直隸建昌縣馬十等行劫錢鋪一案經臬司將夥犯提到省城遞委清苑縣審訊該縣朱腹松提集各犯止將薛熱河兒齊寬李五三犯審訊一次而於盜首馬十轉置之不問任意玩延見將該縣解赴行在交軍機大臣訊詰始則游移閃爍一味狡展繼因嚴加鞫問方行承認詐爲口供並未見首犯幾同笑話其平日居心辦事庸劣狡猾已可槩見而劉峩被該縣所愚保題首邑至今爲其所累可見外省督撫似此誤信屬員濫予升調者正復不少嗣後各省督撫務於平時留心察看加意遴選遇有首府首縣缺出必擇誠實諳練認真辦事之人奏請調補如或因屬員應酬取巧遽行甄拔不能察其誠僞致劣員得以濫竽公事墮廢貽誤地方一經發覺不特該府縣身罹重譴卽保題之各督撫亦必均獲咎戾所謂自貽伊戚朕不能稍爲寬貸也將此通諭知之

○諭建昌縣馬十等行劫錢鋪一案事關盜劫重情非尋常案件可比臬司並不親提研鞫懸宕兩載迄今尙未完結直省吏治實屬廢弛已極夫臬司爲刑名總匯盜案是其專責雖所屬地方遼闊距省較遠之處遇有尋常案件原可督飭屬員勒限完結仍當親加覆覈若案情重大已提至省城辦理臬司仍復養尊處優槩置不問僅委之府縣等官審訊一轉一詳別無究辦之處如此稱職誰則不能又安用厚給俸廉優加品秩虛設此綜理刑名之大員爲耶富尼善於馬十之案旣經提犯到省僅派委首府辦理以致展轉宕延其咎甚重前經降旨令富尼善解任來京聽候部議今思富尼善曾任熱河道員建昌縣係其所屬該處盜劫之事已失察於前及升任臬司復不將首夥各犯親提嚴鞫該員經朕不次遷擢乃於盜劫重案任聽玩延殊爲負恩溺職富尼善著革職

奉問解赴行在交與軍機大臣質訊各省臬司皆當以富尼善爲戒若有似此玩視重案者定行加倍治罪主朱瀾昨已有旨降補保定府知府但伊既接署臬司置重案於不辦僅以一催了事與富尼善獲罪雜均前於西巡回蹕時該員曾任正定府知府於途次召見其應對尙屬明晰且在直年久是以擢用清河道前劉峩面奏該員尙能謹慎但才具平常難勝繁劇亦止空言陳奏是以未經更調而於朱瀾不能稱職之處並未切實奏明今朱瀾於此等重案任意稽延全不以事爲事謹慎之人斷不至此是不特限於才識其平日辦事平常亦可槩見豈宜復膺知府之任朱瀾著革職所有保定府知府員缺著方受疇調補其所遺大名府知府員缺著王銀補授○免經過山東州縣額賦十分之三○丁丑諭前據巡城御史穆克登額奏拏獲建昌縣盜犯王二等供出隨同

馬十等行劫錢鋪一案此係乾隆五十三年之事已閱二載有餘該省止將正犯馬十等拏獲迄今尚未結案因命將馬十解交行在審訊復以審辦此案情節傳訊前署臬司清河道朱淵保定府知府王汝璧並飛提承審之清苑縣知縣朱腹松一同質訊此案係於上年十月內提犯到省總督劉綏並督同臬司親加研鞫該司僅飭委首府審訊首府復藉查賑爲名遞委首縣辦理乃該縣朱腹松止將案內齊寬薛熱河兒二犯訊過一次置正犯馬十於不問卽同餘犯槩行羈禁拖延至今案關劫盜重情各該地方官互相推諉任意宕延該督近在省城於此等要案置若罔聞直省吏治可謂廢弛已極劉綏在直省有年雖非長才而平日居官尙稱謹飭是以擢用至總督數年以來尙無大過惟年齒就衰辦理地方事件不能措置裕如今於劫盜重案任聽屬員欺蔽展轉

玩延若非巡城御史將逸盜拏獲究出盜首則竟至終成疑案有是理乎無能若此豈可復勝畿輔封圻之任本應立予革職照例發往新疆效力贖罪姑念其年已衰邁限於才識尙非有心玩誤著加恩以侍郎降用寶光寵見在出差沈初著調署禮部侍郎其兵部侍郎事務卽著劉崧署理所有直隸總督員缺著梁肯堂補授其河南巡撫員缺著穆和蘭調補其所遺安徽巡撫印務著康基田迅速前往護理穆和蘭俟康基田接印後卽行馳赴新任不必前來請訓江甯布政使印務著閔鶚元卽行委員接署俟書麟瞻觀回任後卽可兼署撫篆康基田再回藩司本任朕辦理庶務宵旰勤求見已年屆八旬猶日孜孜不懈乃劉崧身膺封疆重寄輒敢於緊要案件任聽屬員延玩實非尋常疏玩可比是以降署侍郎不加嚴譴尙係朕格外矜全但恐外閒無識之徒妄生議論

疑及該督辦理差務平常致獲咎戾殊不知此次東巡差務一切極爲妥協起北口等處修葺橋道工程尤屬堅固朕已加賞銀四萬兩若無此案發覺尙當加之獎許今該督玩視要案至於如此不得不治以應得之罪甯以其差務豫備未周加之譴責耶況此案原係審辦盜犯而直省地方官怠玩情形卽因此自行敗露並非朕有意搜求可見天理昭彰凡地方大吏若敢負職辜恩斷不能始終掩飾各省督撫當以劉峩爲前車之鑒匪勉勤慎嚴察屬員如有似此吏治廢弛者一經察出決不稍爲寬貸也將此通諭中外知之○戊寅免山東各屬節年因災緩徵銀兩○以福崧爲安徽巡撫○庚辰免浙江玉環廳租穀海甯州沙地租銀

三月甲申

上至泰安府謁

岱廟○乙酉

上登岱○丙戌諭

軍機大臣等黎何等解至行在命軍機大臣傳旨詢問開導再三

令其赴京隨黎維禪居住遂其效忠黎氏之心而黎何等惟稱黎氏舊臣思欲復仇舉事原非避難內投但願仍回黎氏故土以身殉節等語黎何等既藉忠義之名出辭堅執若令仍回安南自必布散謠言藉端煽惑既與阮光平無益而阮光平或因其心叵測加以誅戮不能相容朕心亦有所不忍已令暫交刑部監禁著將辦理情形傳諭福康安將來阮光平入關時不妨詳細面告天朝已將黎何留京不能復行煽惑永絕後患該國王聞知自當倍加欣感毫無顧慮也○丁亥 上詔 岱廟行禮○賜山東召試諸生杜堦等二人舉人○己丑王站住因病解任調和甯爲四川布政使以周樽爲安徽布政使張誠基署甘肅按察使服闋後實授○辛卯諭軍機大臣等本日據奎林等奏稱獅仔等社生番頭目懷日懷等一十二名均願赴京叩祝萬壽以展惻忱等語該生番

等畏威懷德馴化歸誠聯名額懇祝釐洵屬好事見經奎林等派
令熟悉番情之貢生張維光帶同各番目於三月內由鹿耳門配
船內渡四月內應可行抵福州省城徐嗣曾前已派令八月來京
祝嘏卽著該撫帶同各番目等起身務於七月二十日以前前赴
熱河瞻覲俾與外藩蒙古同與筵宴生番等渡海遠來沿途有大
員帶領行走照料一切較之派委員弁更爲妥善也將此由五百
里傳諭伍拉納徐嗣曾並諭奎林萬鍾傑知之○壬辰諭據伍彌
烏遜奏稱車凌烏巴什之妻呈請將伊族姪貝勒達瓦丕勒之子
固魯扎布爲嗣等語著加恩卽照所請令固魯扎布承襲親王以
示朕矜恤宣勞效力蒙古臣僕之意○免甘肅臨邊各屬番糧草
束其河東河西屯糧草束免十分之三○甲午 上謁 少昊陵
至曲阜謁 先師孔子廟 元聖周公廟○廣山東本年學額○

免福建臺灣府屬應徵供粟其官莊租息銀免十分之三○乙未

上釋奠 先師孔子○賜衍聖公孔憲培及孔氏族人等食並

賚章服銀幣有差○丙申 上謁 孔陵酌酒 上回鑾○改湖

南辰州府屬鳳凰廳通判爲同知○丁酉諭朕親綜萬幾冀臻上

理五十餘年以來於各直省地方事務動求宵旰今已壽躋八旬

猶日孜孜弗懈各省封疆大吏自應仰體朕意董率屬員共熙庶

績乃身爲督撫者惟知養尊處優不以民事爲重凡遇刑名重案

及城工等事往往因循怠忽展轉遲延陽藉詳慎之名陰遂諉玩

之計卽如直隸建昌縣盜犯馬十等行劫一案係乾隆五十三年

二月之事獲犯到案後縣令屢經更易案犯迄無確供及臬司提

至省城遞委屬員審辦並不親提速結事懸兩載該督劉嶸置若

罔聞任其延宕及巡城御史拏獲案內逸犯具奏因令將各犯解

送行在審辦不消一月究出正犯正法並將遲誤之地方官分別
降革治罪以示懲創茲於山東途次長麟奏定借帑修城章程摺
內有金鄉縣城一處係明興任內勘估朕以事隔數年何以至今
尙未辦理欲查部駁何至遲延緣由始據長麟查明此項工程因
奉部駁行縣另估又經該撫及布政使繆其吉覈沂曹道高瑤屢
次駁減往返詳報未能及早興工其辦理遲延之咎實所難辭本
當從重治罪但念該撫等究因奉部飭駁惟恐工料浮多疊加覈
減尙非有意玩延且城工事在可緩亦非劫盜重案可比是以將
該撫及司道等僅交部分別議處不復加以重究就此二事而論
可見外省廢弛積習大抵相同朕省方所至經臨直隸山東二省
因得於兩案洞悉情形分別辦理想其餘各省似此玩延懸宕之
案或更有甚焉者必須妥立章程定以例限庶足專責成而清塵

牘至六部等衙門辦理事務雖有限期由各道御史稽查彙奏但
事有闕涉兩部者亦每至彼此推諉行查不以爲要吏胥等得以
藉端沈閣百弊叢生其駁查外省事件又每以一駁了事或竟有
駁至屢次往返耽延經年累月並不勒限嚴催殊非覈實辦公之
道著大學士九卿科道等悉心會議將各部院衙門及外省辦理
一切要務如何另定期限隨時查覈之處酌籌妥議具奏將此通
諭知之尋議奏酌定例限一各省劫盜及重罪人命案件承審之
員該督撫不得委署他屬及改委會審別項致逾四月之限至原
問官審斷未當另委賢員者其該管上司向例限兩月應減爲一
月覈轉具題一督撫臬司應提省審辦案件以人犯齊集到省日
起限一月完結一由部行查外省事件有於在省各衙門查覈者
以文至日始限二十日查覆有轉行各處查覆者扣除程途以一

月內轉詳逾限司員不嚴催者堂官參處一各省出借籽種口糧未免不及百石亦限一年催徵其僅數石數斗者令地方官賠補一承追銀兩已完交司庫經部行令解部之項以文到日起限六月批解一各省州縣應行解司銀兩自奉文日始限一月完結報部其有因該上司因循以致承辦官離任展轉請咨著追者卽應著落該上司賠補一各省報銷工程案件部駁至三次仍不覈實造報者除照舊奏明分別減准外卽將該督撫及承辦官隨摺參處從之○戊戌 上自濟甯登舟○己亥 上詣 禹王廟分水龍王廟行禮○諭軍機大臣等前以禹貢徐州貢道有浮於淮泗達於河之文淮泗不能相通而河之故道距淮泗甚遠本不合流所云淮泗可以達河之說恐不足據因命彭元瑞紀昀詳考具奏茲據彭元瑞等摘錄諸書加按具奏以爲淮泗不通河之證朕

親加審閱有謂由汴達河者有謂淮泗達於荷澤古文本應作荷
傳寫訛爲河者羣言駁亂紛如聚訟皆由泚釋達字之義謂必因
水及水始名曰達遂致畫地拘時迄不可通耳不知虞夏都冀其
地三面距河九州之貢集於冀州達河卽抵帝都之謂非必一水
徑通也卽如徐州物產墳珠貢自淮夷未必皆可自淮達河泗濱
浮磬亦可自泗達河未必定指淮泗合流達河也猶之近時滇南
銅鉛閩中荔支粵東香橙雖俱由通河以達京師而經歷程途有
水有陸甯得謂滇之洱海閩之建溪粵之潁江皆可與運河相注
而達於京乎卽今證古以意斷之淮泗之水彼時似各爲一流而
皆可各達河此特朕無聊之思著傳諭彭元瑞紀昀再加紬釋考
訂明確詳悉伊等均係讀書博覽之人如有所見不妨據實奏覆
直陳毋以朕意若此曲爲附會也○庚子免烏嚕木齊各州縣額

徵地糧十分之一○壬寅松筠緣事革職以舒濂爲戶部右侍郎

由駐藏大臣遷

○乙巳諭軍機大臣等據富綱等奏緬甸國長孟隕差親

信頭目便居未駝等齎送金葉表文貢品象隻叩祝萬壽於三月

初四日至鐵壁關四月初旬到省後卽派員伴送起身赴京並據

該國長懇請敕賞封號管理阿瓦地方求開騰越關禁俾通市易

等語緬甸國長孟隕攸關內附效惻惟殷前已遣使恭進方物已

邀賞資燕酬茲以朕八旬壽辰普天同慶復敬備表貢遣使來京

祝釐遠涉萬里實屬恭順可嘉自應俯允所請給予封號以資綏

輯俟其貢使到時再將錫封敕書及國王印信交令齎回茲先降

敕褒諭並親書御製詩章以賜仍加賞珍珠手串荷包等件以示

優眷該督等接奉後卽照安南之例遣派道鎮大員二人親齎恭

捧前往宣封面交祇領該國長備沐寵榮自必倍加欣感至該國

自禁止通商以來需用中國物件無從購覓而該國所產棉花等物亦不能進關銷售今既納贄稱藩列於屬國應准其照舊開關通市以資遠夷生計此事不值寫入敕諭著傳諭該督等一面照會孟隕以該國懇請開關業經代奏欽奉大皇帝恩旨准行卽一面飭知沿邊官員定期開關市易以示嘉惠遠人之意再據富綱片奏南掌國王虔備表文馴象遣使祝釐並附進明年例貢不日卽可抵邊等語南掌素稱恭順曾經受封進貢茲復專遣使臣遠來叩祝萬壽係屬好事自應准其所請著傳諭該督俟南掌貢使抵關卽派委妥員護送到省酌加賞賚與緬甸貢使分起前後起程俱於七月二十日前後至熱河行在與蒙古王公各外藩貢使同與壽筵俾得共覩盛典以遂其瞻覲之忱也賜緬甸國長孟隕敕諭曰據雲貴總督富綱奏爾深感天朝厚恩敬備表貢遣使叩

祝萬壽並欲求請封號已將表文呈覽朕披閱表內詞意肫懇祈
願情殷誠悃實屬可嘉朕維懷柔藩服德化所先效悃將虔宜加
褒錫爾自嗣攝國事以來卽遣陪臣具表敬關輸誠納贄朕特鑒
爾恭順降敕褒嘉並賜爾佛像文綺珍玩器皿等物用昭優貺茲
復以朕八旬萬壽率土臚歡遣使祝釐遠涉萬里尤見向化之忱
已命雲貴總督飭送來使前赴熱河行在與蒙古王公回部伯克
及安南國王庶邦君長等同與筵宴瞻仰朝儀並當加以優賚共
沐恩榮至爾以攝國有年欲懇請天朝封號以資鎮撫因念爾國
遠在炎陬恪共職貢茲於遣使之前先期坐擺致潔告虔更徵謹
恪朕甚嘉焉已降旨交該部封爾王爵俟爾使臣到京再將錫封
印信敕書交與齋回茲先降敕褒諭親書御製詩章以賜並加賞
珍珠手串一挂使爾益加欣忭並使爾國臣民同深慶幸已令該

督遣大員二人親齎恭捧送至爾國面交祇領爾既受茲寵錫備
沐殊榮益當倍矢敬共恪遵侯度屏藩南服延及子孫仰副朕撫
遠綏來至意 御製賜獎緬甸國長孟隕詩曰奉表前年施惠往
請封今歲竭誠歸赤心那限萬里隔黃詔從教舉國輝經事自惟
老勝壯化民因識德羸威內安外順胥天佑益切屏營懷救幾○
戊申兩廣總督公福康安奏據安南國王阮光平咨送左江道移
文內稱已派國親鄧文真范文治並政省詞林文臣都督府武職
各員同文署樂工各名先赴黎城該國王往富春省母回義安卽
諏吉起程茲先撰慶祝 萬壽詞曲十章令樂工演習按拍定譜
先行送部伏查前年緬甸貢使帶該國夷樂進京會命內府演奏
今阮光平所進詞曲十章俱係詞闋尙無不合體例且其隨帶樂
工演奏希冀列入太常尤爲恪恭慶忭當卽飭令照繕攜帶進呈

報聞○庚戌諭奎林等奏審擬李同毆死陳誥賄買頂兇一案已交軍機大臣會同行在法司速議具奏矣此案李同斃命買兇各情節業經該縣唐時勳審訊得實因審限已迫與幕友潘鴻緒商辦通報潘鴻緒起意改作尋常毆從輕完結圖避處分該縣家人翁元知此案改輕乘機詐騙兇犯李同番銀五百圓是唐時勳之擅改重案情節幾致正犯漏網翁元之詐屬多賊身罹重辟皆由潘鴻緒起意改案所致今唐時勳已在臺灣枷號滿日發往新疆充當苦差而潘鴻緒係此案罪魁較唐時勳情節更重免其正法已屬從輕若照奎林等所擬轉得於枷滿之日遞回原籍不足蔽辜且幕賓等平日高擡聲價厚得修脯庸劣官員聽其愚弄陷於罪戾伊等轉得置身事外實屬可惡潘鴻緒著照唐時勳之例一併發往新疆充當苦差以爲劣幕舞文者戒嗣後各省劣幕如

有似此主使作弊本官獲罪者定案時俱著與本官同罪不得稍有寬減著爲令

夏四月甲寅諭軍機大臣等據韓鑾奏江蘇高郵州巡檢陳倚道揭報查獲私描印篆假給串票具稟該府州俱未批發本年正月初十日將各稟彙錄詳撫藩各衙門亦未經批發因將所獲各項錢糧偽串請據情代奏等語細閱此案情節及所描印信真偽顯然自非出於捏造閱鶚元係朕信任之人平日辦事尙屬認真似此雕摹印信侵蝕錢糧之事一經發覺卽應嚴行究辦據實具奏朕必寬其失察之咎乃於陳倚道詳稟時竟置之不問旣已失察於前又復掩飾於後殊負委任此案旣經陳倚道揭報必須徹底根究務使水落石出見已欽派大臣前往秉公審辦該撫諒不能將陳倚道加以陷害滅口著傳諭閱鶚元卽將此案情節確切聲

明先行據實陳奏如一無欺飾雖有應得之咎尚可量從末減儻
意存迴護希圖顧預蒙混一經欽差大臣究出實情恐該無不能
當此重戾也又諭地方徵收錢糧全憑串票爲據高郵州胥吏竟
有私雕印信假票重徵之事實屬大干法紀既經巡檢陳倚道查
獲僞串稟明該州究辦該州意存袒庇沈園不辨及通稟巡撫藩
司本府各衙門俱未批發又令該巡檢採辦硝斤自係藉差派往
他處以圖消弭此案如此通同欺蔽徇縱屬員尤非尋常袒庇可
比竟比直隸疏辦盜案更大矣查閱該巡檢黏連呈遞僞串二張
比對真串印篆不符顯有私描私雕情弊該巡檢稟請查究實非
無因况該州因陳倚道屢次具稟面諭該巡檢此係前任之事我
既失察於前難以救敗不過勒令書辦將錢糧彌補無庸迴慮是
該州亦知此案情弊屬實特因前任事件推諉不辦意欲彌補錢

糧將就了事以掩其失察之咎若地方官於此等侵蝕錢糧竟敢私行彌補則倉庫設有虧短侵漁亦將彌補不辦耶書麟身係滿州世受國恩非他人可比高郵州雖其所屬但陳倚道止稟撫藩並未向該督具稟書麟自無由知悉將來咎止失察亦無所用其迴護見在已欽派大臣前來查審著傳諭書麟卽速提集犯證調齊卷案於欽差未到之前先行查明據實馳奏若敢徇庇罔錫元康基田查究不實且以該知州吳瑛係吳嗣爵之子稍存袒護一經欽差查訊具奏必將書麟一併治罪想該督亦不敢代人受過也○丁巳 上幸天津府詣 海神廟行禮

恭查 實錄丙辰御舟駐蹕湖洋莊是

日上策馬至天津府城

○戊午賜安南國王阮光平敕諭曰惟爾嚮化輸誠

傾心內屬爰效虔恭之悃屢修貢獻之儀肫款可嘉文詞克茂茲因朕御賜詩章並將己酉年例貢留抵下次正貢具表遣使陳謝

兼進方物值時巡於春令禮成岱宗闕里而還欣叩覲於行廬蹕旋津淀瀛壖之際旣歡迎於鵠首復瞻拜於馬前是用賚以文綺燕以廣樂俾得觀寰海之殷繁與行營之整肅今者使臣回國特賜王錦段綵紵等物以昭優眷國王情殷祝嘏計已諏吉遵途喜相見之匪遥益承恩於靡旣綸音載錫異命爰申特諭○己未大學士嵇璜重與恩榮宴 御製詩章賜之○庚申諭前經禮部奏內閣中書一項據吏部咨稱見在候補者僅存七員自本年至下屆癸丑科三年之內恐不敷用請照例於會試落卷內錄取三十名等語向例錄取中書係於會試揭曉後將未經中式墨卷送入內簾交主考閱取朕思移送落卷時拆閱彌封查對紅號恐有漏洩情弊而考官閱看墨卷筆蹟亦易於認識且其時會闈已經撤棘復行甄錄中書尤非慎重關防之道向來定例本未周密況中

式進士引見歸班者十年方能銓選知縣而落第者錄取中書轉可卽日得官補缺後六年俸滿又可內用主事外用同知此縣令階級轉大實未平允著將落卷內錄取中書及學正學錄之例卽行停止俟帶領覆試合式之新進士引見後除已經錄用之庶吉士部屬卽用知縣外其餘歸班進士再交吏部按照甲第名次通行帶領引見候朕記名二三十人以中書錄用不記名者仍行歸班如此則考官無從滋弊而歸班進士添一錄用之途實屬兩有裨益所有本年會試落卷如未經錄取竟可毋庸辦理卽已經錄取亦可不必嗣後如挑取學正學錄亦照此辦理○辛酉命撥部庫及河南山西藩庫銀兩解直隸備用○命吉慶會同嵩椿勘明英額邊至靈陽邊開拓邊界丈量荒地分賞盛京各城旗人之無田地者○癸亥諭前據高郵州巡檢陳倚道揭報查獲假印串票

一案隨諭書麟查奏茲據奏稱陳倚道於上年冬兩次將查獲假印串票稟報該州吳瑛竟置不辦直至本年經陳倚道通詳始捏稱訪獲稟報請將吳瑛革職嚴審等語該州假印給串之事知州吳瑛不能察出嚴究及巡檢陳倚道訪獲稟報意存袒庇警役沈閻不辦至數月之久又因該巡檢通詳知事難掩覆始捏作訪聞具稟實非尋常徇玩可比吳瑛著革職交與慶桂等會同該督秉公嚴審定擬具奏○諭據琅玕奏西塘一帶自潮神廟迤西至烏龍廟止隨塘漲出陰沙長五千七百餘丈寬自二百丈至一千五百九十丈不等該處石柴各塘層層保障實爲益加鞏固等語覽奏欣慰之至范公塘一帶爲杭州省城之保障石柴各工全賴陰沙爲外衛今該處迤西隨塘漲出新沙寬長至數千丈沙灘堅實業成高阜其迤東一帶自必逐漸漲長而對面南岸陰沙日新坍

卸塋身鞏固更足以保衛民生此皆仰賴 海神默佑靈貺聿昭
始得成此北漲南坍之勢實爲濱海居民額手感慶著將內府藏
香四十炷發交琅玕卽著該撫親齋至 海神廟虔誠告祭用答

神庥○乙丑 上還京師○丙寅 上詣 黑龍潭祈雨○諭

高郵州巡檢陳倚道揭報戶部查獲私描印信假給串票一案會
經降旨令書麟閱鶚元查明據實先行覆奏昨據書麟奏知州吳
瑛袒庇書役沈閣不辦屬實已將吳瑛革職嚴審矣本日據閔鶚
元覆奏此案先據巡檢陳倚道稟報卽經批行江甯藩司會同嚴
查速辦仍候督院批示嗣於二月十二日經過揚州該府劉炳知
州吳瑛稟稱假印偽票一案見在拏獲糧書夏琯究出實情等語
前據韓鐸將陳倚道揭報詳文及呈驗私描偽串呈覽朕卽以此
案情弊顯然自非出於捏造該巡檢卽於正月十六日稟知閔鶚

元而該撫並未參奏已屬袒護劣員卽應立予嚴懲因念該撫平日辦事尙屬認真著卽將此案情節確切聲明據實陳奏雖有應得之咎尙可量從末減故特派慶桂等會同書麟前往查辦外復令該撫先行覆奏朕之於閔鶚元不啻推心置腹乃閔鶚元始終袒庇吳瑛曲爲開脫以此案係該州稟出實屬有心取巧又復稱此案仍候督院批示試思此案件應督辦乎應撫辦乎吳瑛曾稟總督乎抑先稟伊巡撫乎伊乃意欲諉過總督將來定案時朕未必將通省大員槩行罷斥若書麟得邀寬免伊亦可希冀留任詎知陳倚道若果稟知書麟而該督並未奏參此時更當加倍治罪矣儻閔鶚元果無消弭情弊當陳倚道稟報時何不一面奏聞一面咨會總督彼此連銜速辦乃僅於陳倚道稟內批示非瞻徇屬員而何直隸馬士等一案朕將大小官員嚴行懲治閔鶚元豈不

知之然劉莪不過形同木偶司道等耽延不結尙屬廢弛公事卽朱腹松亦未稟詳總督朕尙將劉莪降用富尼善朱瀾等分別嚴行治罪今江蘇高郵州私雕印信假串重徵關繫官員書吏重罪其事較之直隸遲誤盜案更大而閔鶚元始則意欲彌縫其事繼復飾詞迴護實屬狡詐負恩朕臨御五十五年夙夜勤求治理未嘗稍事暇逸雖意欲於六十一年歸政然一日在乎其位卽一日業乎其官此可告之天下臣民者乃閔鶚元欲以此大干法紀之事希圖顛覆混過於朕前巧爲嘗試其居心大不可問矣朕方以閔鶚元久任巡撫尙能實力辦事將來或內用尙書外擢總督皆不可知伊竟福薄災生自取罪戾豈可復膺封疆之任閔鶚元著卽解任交與慶桂等一併歸案質審所有江蘇巡撫員缺著福崧調補何裕城著調補安徽巡撫其江西巡撫員缺著姚秦署理托

倫著補授江西布政使其所遺江西按察使員缺著司馬駒補授
○諭軍機大臣等康基田專任錢穀於高郵州雕捕假串冒徵錢糧之處一經發覺卽應嚴行究辦儻巡撫有迴護屬員情事該藩司本有奏事之責若果據實嚴參或徑詳揭督撫方爲不負任使諒閔鶚元亦難勒令徇隱乃康基田於本任應辦之事復移交臬司查究如此推諉遲延竟至三月之久非有心袒庇該州卽係迎合閔鶚元之意欲圖消弭其事康基田向來熟悉河務辦事尙屬認真朕方加之委任此事不應有心徇庇若此深爲可惜著傳諭康基田卽將此案因何不據實參奏並有無瞻顧上司請託示意抑係已意徇庇屬員一併明白直奏將來定案時或可稍從末減毋再稍有隱飾自貽伊戚也○己巳諭許世亨之子許文謨承襲伯爵經兵部帶領引見已加恩授爲頭等侍衛矣許世亨身殉行

陣忠烈可嘉今伊子甫經來京當差一切未免拮据著加恩卽給
予本年伯俸並賞官房一所資棲止伊母及家屬等見在川省
原籍並著孫士毅從優照料咨送來京用示朕優加體恤至意○
庚午諭據書麟奏查審高郵州假印串票一案大槩情形一摺內
稱高郵州知州吳瑛接據陳倚道兩次具稟並不批發揚州府知
府劉炳於陳倚道具稟之後卽行提審將林之佩假印偽票各情
究出尙無扶同徇庇情事因該府將陳倚道之稟批發到州閱鞫
元康基田將陳倚道之詳批行到府陳倚道無從知悉以致疑爲
未批等語閱鞫元於本年正月十六日接閱陳倚道稟帖不卽參
奏二月十二日路過揚州經該府劉炳知州吳瑛稟知此事又未
親行究辦直至三月初四日吳瑛捏稱訪聞詳報始批司飭府提
審耽延兩月僅以一批了事明係遷延不奏有意消弭其袒護劣

員之咎實屬百喙難辭知府劉炳奉委審辦此案業已訊出描印
僞串情節復藉稱犯證未齊不卽通詳辦理其爲扶同徇隱情弊
尤屬顯然乃書麟並不細覈詳稟批發月日嚴究徇縱情節將閔
鶚元參奏轉稱閔鶚元曾經批飭到府陳倚道無從知悉劉炳業
已提審尙無徇庇情事代爲掩飾枝梧曲加開脫殊出情理之外
書麟其何膽敢爲此奏欺朕乎此案關係吏胥假票重徵官吏通
同欺蔽已特派慶桂王昶馳驛審辦以書麟平日辦事尙屬認真
陳倚道並未稟過總督該督咎止失察亦無所用其迴護是以令
其會同查審今轉先爲開脫希圖掩飾並不將閔鶚元及該府劉
炳嚴參一味瞻徇實屬有負委任書麟失察於前之過小欺罔徇
庇之罪大矣此時將自救不暇何能從并救人耶書麟著交部嚴
加議處又諭據書麟奏查審高郵州假印串票一案一味瞻徇文

飾爲閔鶚元等巧詞開脫已降旨將書麟嚴加議處矣朕反復思之此案閔鶚元若於正月十六日接閱陳倚道詳稟卽一面批飭藩臬兩司一面通知總督商辦豈兩司轉不具詳總督是此案不獨撫藩知之而書麟與臬司於正月內亦卽早知有此事矣書麟豈得諉爲不知臬司又何以不辦此皆有案卷月日可查人證可質者且閔鶚元於正月內陳倚道具稟時實有此批該巡檢豈有自行揭部並有未奉批發之語明係二月內閔鶚元經過揚州知此案終難掩飾始授意該府州捏作訪聞查拏通稟方有仰藩臬查辦仍候督院批示之語以爲掩飾彌縫卽過地步則所云陳倚道詳稟卽時批飭其爲事後補批更屬顯然斷難逃朕洞鑒閔鶚元袒護屬員延閣不發並不剗知書麟該藩臬又不詳稟而知州吳琬於上年冬閒節據陳倚道稟知此事沈閣數月直至本年二

月內書麟路過徐州時始行捏清具稟知府劉炳亦係於上年十二月內接到該巡檢稟報匿不具詳是一省大小官員自巡撫藩臬以至府州通同蒙蔽將總督視如無物書麟若稍有人心見此情形方且憤恨之不暇何乃轉爲袒庇竟欲將閔鶚元等全行開脫實又出朕意料之外由此推之外省官官相護惡習牢不可破督撫等皆如此連爲一氣罔上行私又何事不可爲耶朕因書麟在總督中係竊知實心辦事小心謹飭之人於河務尙爲諳習是以原其失察之咎特加委任令其同慶桂等審辦此案尙係格外之恩竟不料書麟膽敢有心欺飾希冀化大爲小以此奏豫占地步欽差大臣到彼時即可傍壁循牆依據葫蘆將就完案不能出其範圍此等伎倆輒敢於朕前嘗試視朕爲何如主耶書麟係高晉之子世受國恩經朕不次加恩擢用總督尤非他人可比若以

朕年已八旬精神或有未周於大小事務不能如前照察遂思巧爲蒙混如此居心欺罔卽予立寘重典亦屬罪所應得且書麟甫接駕而去未見朕之精神如舊乎竟敢如此實爲可惡姑念該督平日居官尙稱廉謹而於河工事務亦能留心尙可暫寬一綫但僅交部嚴加議處不過議以革任不足示懲書麟著先革去翎頂暫留總督之任以觀後效其應得廉俸等項全行停止俟定案時再覈其情罪另降諭旨不必交部議處並著將指出各情節卽行據發天良據實明白回奏康基田身任藩司錢糧是其專責乃於本任應辦之事經巡撫批令嚴查轉移交臬司辦理推諉遲延竟至三月之久况藩司有奏事之責一接陳倚道稟報卽可據實參奏督撫等諒亦何敢抑勒消弭乃亦瞻徇推諉非袒護屬員卽係迎合閔錫元之意其咎實無可追康基田亦先著革去頂帶暫留

藩司之任且俟定案後再降諭旨看來此案甚有關係非慶桂王昶所能審辦者且恐二人不能堅定漫無主見必致附和書麟所奏代人受過慶桂等竟無庸在彼辦理卽著將閔鶚元劉炳吳瑛傳旨革職拏問同案內犯證一切卷宗迅速押帶解赴熱河行在審辦途間務須小心防範若閔鶚元等或有畏罪自戕之事必將慶桂王昶按律抵罪巡檢陳倚道有應行質證之處亦著帶同前來並著慶桂等諭知該員此案係伊揭出本屬無罪之人見在帶往質證一經得實必邀聖恩獎擢不必稍存疑懼如此明白告知不可加以恐嚇也朕臨御五十五年親綜萬幾勤求治理今距歸政之期尙有六載猶日孜孜不懈內而各部九卿外而督撫藩臬俱宜屏除私意各矢忠良勉力奉公小心敬事如敢稍存欺蔽則是罪由自取朕亦不能曲加寬宥此事前車之鑒勿謂朕言之不

豫也將此通諭知之○癸酉賜安南國王阮光平敕諭曰據協辦大學士兩廣總督福康安奏國王於三月二十九日起程四月十五日進關帶領親子阮光垂陪臣吳文楚等一同瞻覲並將國王謝恩表文進呈朕覽王表情詞真摯愛戴肫誠披閱之餘深堪嘉尚特於表文內親爲批答國王身受藩封備膺寵命以本年八月朕入旬壽辰親率王子及陪臣等遠踰萬里詣闕祝釐並以朕爲師爲父深冀成全鑒王惻忱真如家人父子王旣以父視朕朕亦何忍不以子視王且王子年甫垂髫情殷瞻就益徵訓秉義方情根至性特降旨封王子阮光垂爲世子俟入覲時頒發敕書並賞給冠服茲先賜國王御用大荷包一對小荷包三對香器六匣賜王子御用大荷包一對小荷包二對香器四匣用示優寵計此時國王早經就道相見匪遙並當祇奉恩綸懋承渥眷欽哉特諭○

實授孫士毅四川總督以李世傑爲兵部尚書

原任四川總督

○甲戌

上詣覺生寺祈雨

○乙亥諭內外文武大臣特恩賞在紫禁城內

騎馬用資代步但年老足疾之人上馬亦覺艱難如大學士嵇璜雖經賞馬仍恐難於乘騎嗣後已經賞馬之大臣因有足疾難於步履者著加恩准令乘坐小椅旁縛短桿用兩人舁行入直以示朕眷念大臣恩加體恤至意尙書李世傑患病並有足疾著加恩准照此例○賜石韞玉等九十七人進士及第出身有差○丙子諭康基田覆奏高郵州摹雕印串冒徵錢糧一案僅自詔糊塗遲誤而於瞻顧上司徇庇屬員各情節仍不據實直陳是其竟無良心孤負委任厚恩難以從寬留任康基田亦著革職拏問交慶桂等一併解赴熱河行在歸案審訊所有江甯布政使員缺著陳大文補授○丁丑調恩明爲安徽按察使以姚學瑛爲陝西按察使

由湖南
鹽道選

○戊寅諭軍機大臣等據富綱奏緬甸貢使於四月十二日到省十五日齋表起程前赴熱河等語本年朕八旬壽辰外藩屬國俱各納貢祝釐定於七月十四日筵宴前經降旨令緬甸貢使於七月十一日南掌貢使於七月十二日次第前抵熱河今該貢使等俱於四月中旬自滇起程計七月十一十二日至熱河行在同與十四日筵宴尙有八十餘日儘可從容趕到亦不至過於勞頓也再另摺奏耿馬土司罕朝瑗謹備馴象二隻遣應襲長子罕廷所押送至省懇轉奏恭祝萬壽等語該土司辦理撫輯事宜向屬勤勉妥協茲虔備象隻懇請代奏祝嘏具見惻誠除所貢象隻准其賞收外著賞給大段四匹以示嘉獎○己卯諭李世傑在總督任內辦事實心因患病奏請解任特命來京以兵部尙書補用見在病尙未痊需人侍奉伊孫李再瀛前經加恩賞給進士授

爲主事今李再瀛業已病故惟李世傑次子知州李華封丁母憂服闋隨侍來京著卽加恩以員外郎補用俾得就近侍養以示格外體恤○庚辰舒濂縣事革職以慶成爲戶部右侍郎○免山西太原遼州等十六府州並歸化城等處額賦十分之三其大同朔平二府及和林格爾等處新墾地畝並招墾地租銀兩豐甯二廳地畝額賦一體蠲免

五月辛巳朔 皇六子和碩質親王永琿薨予祭葬諡曰莊○壬午諭軍機大臣等福康安等奏阮光平於十三日行抵諒山親率子臣等進謁福康安等將節次諭旨宣示阮光平叩頭謝恩據稱賞用金黃鞋帶已覺聖恩過重抱見之禮更爲逾格優隆未敢承受特具表懇辭伊子阮光垂因途間染恙福康安等准其先回謁攝派員護送出關並將阮光平謝恩慶賀各表進呈所辦俱好朕

覽該國王所進表文肫切誠懇特用硃筆詳晰批示至伊子阮光
垂偶抱微疴該國王額懇旋國調理應准其所請茲將賞阮光
垂玉如意一柄同硃批表文著福康安面交該國王祇領並告以
王子鬆年聰穎志切瞻天大皇帝格外加恩封爲世子今因染恙
旋國雖未能隨同入覲而中心愛戴大皇帝深爲嘉予特賞世子
玉如意一柄以爲吉祥如意自應卽日安痊至國王辭謝行抱見
請安之禮措詞謙謹大皇帝覽表深鑒肫誠國王務恪遵恩諭不
必再爲辭謝如此詳晰告知俾該國王益深歡欣入覲之忱也再
賞福康安阮光平御製集石鼓詩序墨刻各一分隨報發去俾得
一同祇領○癸未諭據福崧奏經過直隸山東一帶均已甘霖普
被二麥俱已結實飽綻大田苗禾長發菁蔥晚禾見亦出土又另
片奏稱山東齊河長清等處已萎麥苗復得吐穗結實一律飽綻

等語所奏殊不可信本年直隸山東一帶得雨較遲麥苗未能及時長發朕蹕路所經之處自東昌臨清池西一帶至直省地方沿途望澤維殷總未得有透雨旋蹕後會親自祈禱雖經得雨尙欠優霑今福松遠稱甘霖普被未免過於飾言至麥苗已萎復生之事前據長麟奏聞朕卽以春膏未能霑足方深慚悚會於摺內批示並不以此爲奇福松路過該省又復將此具奏矜爲異事殊不知麥田被澤已遲收成不無歉薄間有黃萎麥苗另生新枝結實於農田大槩收成未見裨益朕臨御五十餘年勤求民瘼每遇各省地方偏隅被旱宵旰憂勞無時或釋卽麥苗有三穗雙歧之事從不多言祥瑞督撫等惟當仰體朕懷盡心民事感召天和俾閭閻共慶盈甯方爲無忝厥職今福松意存粉飾附摺瀆陳封疆大吏豈可如此存心福松係經過山東並非本屬卽以此等事件率

行由驛馳奏將來前抵江蘇新任自更緣飾虛文致有譁災匿報之事殊負朕棄瑕錄用之意福松著傳旨嚴行申飭若再不知改悔心有高興斷不能曲加寬宥也將此通諭知之各省督撫務當引以爲戒○諭軍機大臣等從前高麗國王及科爾沁等處蒙古藩王來京瞻覲曾派禮部堂官一員往迎賜茶茲阮光平親自赴闕祝釐愛戴惓忱實堪嘉尚著禮部左侍郎德明於該國王將次抵京時前往良鄉迎迓賜茶並傳諭福康安於途次遇便告知○丁亥諭軍機大臣等前聞浙省漕務有浮收情弊降旨令伍拉納訪查茲據奏稱見有嘉善縣糧戶陸建業等來閩呈控革書袁坤一漕總秦惠勳等將伊運交漕米一百六十一石僅給一百石九斗九升串票業經飭提案內緊要犯證串簿解閩親審等語是浙省漕務浮收加耗積弊仍未清釐而吏胥等敢於乘機作弊或竟

係該管地方官亦有通同故縱情弊琅玕才具中平爲人老實易爲屬員蒙蔽顧學潮尙知謹慎自守而不能約束伊子更難望其整飭地方必須該督切實嚴查方能肅清積弊今伍拉納一經糧戶呈控卽行提赴閩省親行審訊所辦極是著傳諭伍拉納務卽嚴訊犯證檢查串簿秉公據實具奏不得稍有瞻徇至琅玕身爲巡撫不能清查漕弊咎已難辭若敢稍存迴護授意屬員以冀消弭此事或伍拉納被其所欺豈能逃朕洞鑒朕必照辦理高郵假串一案之例將琅玕拏解來京審辦閔鶚元卽伊前車之鑒恐該撫不能當此重戾也○戊子諭據長麟奏平度州知州郭清芳詳報張子布將羅王氏踢傷身死一案萊州府知府徐大榕審係羅王氏率同伊子羅有良將張子布毆傷待斃羅有良自將伊母踢死圖賴隨提犯來省發交接察使甘定進親訊審明張子布踢死

羅王氏屬實徐大榕固執己見不肯遵辦甘定進又不能究出實據折服該府之心茲復親訊犯證實係張子布毆踢致死並究出郭清芳相驗時遺漏多傷不報請將徐大榕郭清芳革職審擬甘定進交部嚴加議處等語郭清芳承審命案於相驗屍傷時並不遵例將兇器比對遺漏傷痕咎實難辭而所報兇犯尙無錯誤惟知府徐大榕自逞臆見妄斷石延轉欲科屍子以蔑倫之罪實屬任情顛倒若非別有意見何以於此等重情意爲出入徐大榕郭清芳俱著革職拏問交該撫研審定擬具奏甘定進本係河工同知因辦理黃河漫工埽蝨落水尙屬奮勉是以不次升擢用至按察使本年朕巡幸山東召見甘定進觀其人本庸率難勝臬司大員之任今於此案要證情節未能審訊得實延緩稽遲交部嚴議自當議以革職姑念該員曾在河工出力尙可加恩錄用甘定進

著來京以五品京堂用○以陸有仁爲山東按察使

山福建糧道遷

○庚

寅 上啓鑒秋獮木蘭○免經過地方本年額賦十分之三○辛

卯諭軍機大臣等福康安等奏帶領阮光平途次行走情形一摺並鈔錄該國王遞回昇隆城等處書信三封進呈所辦甚好阮光平疊受殊恩誠心感戴入關以來得覩天朝幅員廣闊聲教覃敷欽羨之餘並懷震懾而一切優加體恤其歡欣感激情狀自屬出於至誠至途次寄回書信俱未緘口足見該國王小心曉事十分恭謹而書中所諭處分國事井井有條兼述天朝優待隆恩不特藉以誇耀臣民並使該國人心更加帖服看來阮光平用心周到足以永資鎮撫長受朕恩深堪嘉尙但該國王入覲祝釐往返約有八九月之久其國事必須往來酌商若一律俱不緘口轉非示信遠人之道著福康安於途中告以天朝體制凡外藩呈遞文報

雖例不封口今國王身列藩封誠心入覲大皇帝一視同仁無分
中外嗣後往來書信俱不必拘於成例槩不緘口如此詳悉諭知
俾得益加欣感並可釋其疑意○壬辰諭前因伊齡阿汪承需辦
理科場事務不能實力稽查一味沽名邀譽是以將伊二人降調
今因內務府事務較繁應量爲添派以資稽覈伊齡阿著加恩以
三品職銜在總管內務府大臣上行走汪承需亦著加恩署理通
政使○丙申 上詣熱河 文廟行禮閱視新鐫石鼓於戟門前

上駐蹕避暑山莊○己亥諭高郵州僞串冒徵一案書麟閱鶚
元等有心徇庇取巧負恩節經降旨嚴懲見在閱鶚元等業經解
到交軍機大臣會同行在法司嚴審定擬後仍發往京城著大學
士九卿詳酌定擬此案陳倚道雖未稟知臬司但知府劉炳接到
陳倚道吳璵先後稟詳於二月十五日具稟王士棻而閱鶚元又

復批飭藩司會同該司查審臬司有奏事之責見撫藩通同徇隱
自應據實參奏一面親提嚴審乃亦置若罔聞延閣不辦非迎合
上司卽係袒護屬員與陳倚道稟知康基田而該司並不參奏提
審有意逢迎徇庇厥罪維均今康基田業經革職拏問解赴熱河
審辦該臬司係棄瑕錄用之人如此負恩溺職豈得置之不問王
士棻亦著革職交與書麟福崧嚴審有無迎合袒庇實情定擬具
奏所有江蘇按察使員缺著陳奉茲調補其所遺河南按察使員
缺著李鴻補授○庚子諭金簡奏安置黎維祁及伊族人屬下人
等一摺黎維祁雖孱弱無能不克保其土宇但念黎氏職貢百餘
年極爲恭順因特授爲佐領贍及身家俾得永列仕途宗支完聚
已屬格外恩施今黎維祁帶領家屬人等從粵西甫到京城室家
初定一切用度未免稍形拮据此時春季已過所有俸銀俸米仍

著補行給予並加賞銀二百兩用資安頓至潘啓德以都司職銜補爲驍騎校亦係四品頂帶與黎維祁佐領頂帶相同未免無分等級黎維祁再加恩授爲三品職銜以示區別○王寅免西藏所屬三十九部落錢糧○癸卯諭四庫全書舊萃古今載籍至爲美備不特內府珍藏藉資乙覽亦欲以流傳廣播沾溉藝林前因卷葉浩繁中多舛錯特令總纂等復加詳細讐校俾無魯魚亥豕之譌茲已釐訂歲工悉臻完善所有江浙兩省文宗文匯文淵三閣應貯全書見在陸續頒發藏庋該處爲人文淵藪嗜古好學之士自必羣思博覽藉廣見聞從前曾經降旨准其赴閣檢視鈔錄俾資蒐討但地方有司恐士子等翻閱污損過爲珍祕以阻其爭先快覩之忱則所頒三分全書亦僅束之高閣轉非朕拔輯羣書津逮譽髦之意卽武英殿聚珍板諸書排印無多恐士子等亦未能

全行購覓著該督撫等諄飭所屬俟貯閣全書排架齊集後諭令該省士子有願讀中祕書者許其呈明到閣鈔閱但不得任其私自攜歸以致稍有遺失至文淵等閣禁地森嚴士人等固不便進內鈔閱但翰林院見有存貯底本如有情殷誦習者亦許就近檢錄掌院不得勒阻留難如此廣爲傳播俾茹古者得觀生平未見互爲鈔錄傳之日久使石渠天祿之藏無不家弦戶誦益昭石文稽古嘉惠士林盛事不亦善乎○甲辰諭福崧奏前任巡撫閔鶚元任內有句容縣知縣王光陞詳稱該縣糧書江嵩年等將花戶完納錢糧拆封侵那一案閱鶚元僅批飭江甯府提犯審訊難保無瞻顧輕縱見已飭委臬司王士棻馳赴該縣調覈糧申犯證來省親加嚴鞫等語閔鶚元久任封圻從前尙能實力辦公留心民事况伊科分已深朕原欲內用尙書外擢總督或將來閣員乏人

卽簡任綸扉皆不可知乃於巡檢陳倚道稟詳高郵州書吏假印
冒徵疊次具稟知州知府並不批發一案閱鶚元始則有意消弭
繼復飾詞迴護罔上行私罪無可追因令革職拏問解赴熱河交
軍機大臣等嚴加審訊見據供認屬實俟康基田解到對明後再
交在京大學士九卿等定擬具奏朕猶念閔鶚元在巡撫中尙係
可用之人欲於法外施恩會向軍機大臣言及或可從輕定以發
遣新疆伊已年逾七旬將來尙可准其納贖朕之於閔鶚元特加
寬宥者原因其平日尙知愛民動事故不忍寘之重典乃今於句
容縣糧書擅自拆封侵那舞弊一事又並不親提嚴審僅以批飭
兩司及江甯府查辦了事試思句容卽係江甯所屬該府自顧失
察屬員處分必致代爲掩蓋彌縫力圖開脫豈肯認真查訊究出
實情亦必至如高郵一案上下通同徇隱使鄉愚小民屢受蠹役

劣書之擾冤抑莫伸朕又安用此大吏司牧爲耶卽如以閔鶚元所犯之事卽交閔鶚元查審伊豈有不自行迴護之理况高郵假印冒徵甫經破露而句容縣書吏又復有私自拆封侵蝕錢糧之事江蘇爲財賦之區錢糧繁重兩三月內卽發覺二案則各屬似此者亦當不少可見閔鶚元坐享豐腴惟知養尊處優而於地方關繫擾累閭閻官吏作奸犯科之事一切付之不理並欲爲屬員豫留地步任其掩飾蒙混沽譽徇私昧良負恩莫此爲甚此而不嚴加懲治何以肅吏治而儆官邪且高郵一案係巡檢陳倚道揭報戶部始行敗露並非朕有意吹求亦無人在朕前奏及總因閔鶚元受恩深重如此喪盡天良無事不心存欺飾以致天奪其魄接踵呈露實爲天理所不容直隸馬十等一案劉峩不過形同木偶司道府縣耽延不結尙係廢弛公事今高郵句容二案假串侵

那俱係有累百姓之事聞鶚元竟敢玩視民瘼徇情飢法封疆大吏皆如此居心行事紛紛效尤民生國計尙可問乎是聞鶚元不能再爲寬貸著交大學士九卿於定擬時卽當同以重辟用示懲儆福崧甫到江蘇卽將此案查出據實參奏並不稍事瞻徇尙屬可嘉著交部議敘署句容縣知縣王光陞卽著革職交與福崧提同案內犯證秉公嚴審定擬具奏朕臨御五十五年兢兢業業無日不以敬天愛民爲念此天下臣民所共見共聞者迺聞鶚元欲將此等大干法紀之事希圖顛預混過是誠何心朕驚蹕入旬普天同慶今歲錫恩之事甚多若於此等重案因舉行慶典遂爾加恩寬恕不嚴加懲治則封疆大吏又何以示儆不爲也朕代上蒼惠養黎元孜孜不倦惟有日慎一日以期朝野乂安共成郅治而民生休戚時切於懷凡內而閣部九卿外而督撫藩臬俱

宜仰體朕懷各矢天良小心敬事如因朕年高未必留心萬幾稍存欺蔽使吏治不能整飭民隱壅於上聞閔鶚元卽前車之鑒慎勿以身試法也將此通諭知之○己酉諭永皓薨逝伊子縣聞甫生數月旋又殤殂見在無嗣所遺王爵若照宗人府所奏遽行削除朕心不忍加恩著永澤承襲貝子○諭軍機大臣等福崧奏句容縣糧書侵用錢糧一案派委司道嚴查續行查出歷年侵欺銀三千七百兩漕米八百餘石見在親往查辦等語所辦不避嫌怨甚屬持正著賞給大荷包一對小荷包二對以示嘉獎江蘇爲錢糧繁重之地高郵一案甫經敗露今復有句容縣糧書歷年侵蝕銀三千七百餘兩漕米八百餘石之多此項錢糧例應年清年款詳解報司該書吏等又何能侵蝕入己必係官吏通同以完作欠至漕米一項按額交完一有短缺卽不能足數兌收又何以侵蝕

至八百餘石之多明係斛面浮收上下漁利此等情節該督撫漫無覺察一任蠹書侵欺舞弊而總督藩司駐紮江甯竟同聲頂該省官吏作奸犯科之事竟至上下相蒙毫無顧忌或恐不止此矣書麟久任封疆受朕恩眷最爲深重乃竟坐擁廉俸不思正己率屬一味養尊處優任聽地方諸事廢弛若不嚴加懲治何以肅吏治而儆官方著傳諭福崧卽傳諭將書麟革職拏問解交刑部治罪所有兩江總督事務著福崧暫行兼署候朕另行簡放福崧甫到江蘇卽能查出此案秉公嚴辦業經勢不兩立不必再存討好邀譽之見務須徹底清查認真查察儻仍有似此官吏舞弊擾累民生之衆或道府有徇庇屬員通同欺隱情事當卽據實嚴參毋稍隱飾方不負朕委任封疆大吏果能各發天良認真辦事朕斷不因眾人有怨懟之言轉加責備該撫又何所畏憚而不認真查

辦耶至前任句容縣吳汾亦著革職拏問歸案審辦閏鶚元因何將該員調委他處或明知該縣官吏有此通同舞弊之事故令王光陸前往署理希圖代爲彌補掩蓋亦未可定亦著該撫一體嚴查據實覆奏○諭本日軍機大臣將金簡寄到溫榆河全圖及說帖呈覽朕詳加披閱據說內稱溫榆河自居庸關外軍都山發源匯合八達嶺及黑龍潭二處之水經沙河直達蘭溝流至三岔河南入通州境等語而其所繪圖內則溫榆河係在通州界內溫榆河既發源軍都山則自沙河以北爲溫榆而自既入沙河以後卽不可謂之溫榆如白河已入潮河卽爲潮河之水猶之伊洛瀍澗既入於河則總名爲黃河而不得復別之爲伊洛瀍澗此其顯然可證者也乃圖內由軍都山迤南歷經沙河蘭溝三岔河等處直至通州新開河口始籤貼溫榆河字樣殊不可解著傳諭金簡再

行詳覈是否係軍都山發源之稱及到通州地方又有溫榆之名
詳晰繪圖黏籤呈覽勿致再有牽混

六月庚戌朔諭軍機大臣等昨據福崧續奏句容縣糧書侵盜多
賊一摺朕反復思之其中弊竇甚多該縣每年額漕一萬一千餘
石書吏竟侵用八百餘石是所侵之數幾及十分之一漕艘受兌
時該運弁何以竟肯短額接收若該運弁受賄通同含糊收兌則
過淮時總漕又何以籤盤驗放卽抵通交卸按數收兌亦斷無不
查出之理儻該縣浮收斛面加倍苛徵應完一石竟至交納兩石
之多小民雖愚亦必不能聽其如此抑勒四面比對其中情弊顯
然不可不逐一查明以期永落石出見在南糧交卸業經陸續回
空諒此時尙未全出東境管幹貞見已督押尾幫行抵濟甯著傳
諭長麟和琳會同管幹貞面詢該省督運糧道及押運員弁所有

江甯衛幫船其於開兌時句容縣漕米究竟有無短絀如何受兌
交納之處令其據實登覆毋稍隱飾儻江甯回空幫船已出東境
卽令福崧就近查究如糧艘收兌時竟無短絀其弊必係該縣官
吏通同浮收上下漁利一經徹底根查自難始終狡飾也○辛亥
諭軍機大臣等福康安奏清遠縣途次帶領阮光平跪接敕封阮
光垂爲世子諭旨及荷包香器該藩恪恭欣幸伏地叩首並稱尙
有長子光纘見在監理國事光垂爲次蒙恩晉封世子不敢承當
特具表申謝朕欣覽之餘深爲嘉尙特用硃筆批答以示優寵著
將原表發交福康安轉給阮光平閱看並告以大皇帝接覽謝表
方知光垂爲國王次子國王不稍隱飾披誠具奏實屬深曉大義
大皇帝特命閣臣撰擬敕書卽封王長子阮光纘爲世子至節次
所賞物件仍給予阮光垂再賞給王世子阮光纘玉如意一柄大

荷包一對小荷包二對紗四端茶葉二瓶扇一匣香器七匣藥錠二十封俾得同霑寵錫均被恩施○壬子調孫士毅爲兩江總督以保甯署四川總督○癸丑諭江蘇高郵州書吏僞串冒徵經巡檢陳倚道疊稟知府並不批發查辦及通詳巡撫藩司又不親提嚴訊據實參奏閱鶚元始則有意消弭繼復捏詞欺飾昧良負恩罪無可貸因將閱鶚元革職拏問解赴熱河經軍機大臣等審訊屬實按律治罪書麟身任總督統轄兩江察吏安民是其專職乃於高郵書吏飢法累民重案旣不能覺察於前及事經敗露又思爲閱鶚元等飾詞開脫行私罔上獲罪甚重猶以伊在江甯事或不知格外加恩止革去翎頂暫予留任外閒無識之徒或有私相竊議謂朕於滿漢大臣獲罪懲處有所輕重歧視於其閒不知巡撫爲刑名錢糧總匯衙門閱鶚元於此等關繫冒徵累民之事旣

經巡檢稟揭猶復上下通同徇隱僅以批飭兩司了事玩視民瘼莫此爲甚實屬辜恩溺職而書麟駐紮江甯距高郵稍遠或一時耳目難周且陳倚道亦未將此案稟知總督尙可量寬一綫是以未及將伊革職拏問朕於諸臣罪戾處治一秉大公輕重原視其人之自取也及據福崧查出句容縣書吏私自拆封侵用錢糧一案閱鶚元又僅批發兩司交江甯本府查辦該府自願失察屬員處分必代爲彌縫開脫又致如高郵州一案上司屬員連爲一氣使鄉曲小民屢受蠹役侵漁冤抑無伸閱鶚元之罪更重昨福崧果又續查出句容書吏侵用錢糧三千七百兩漕米八百餘石與從前該縣所報數目多少懸殊是江蘇官吏積年舞弊擾累閭閻吏治尙可問乎書麟駐紮江甯距句容不過數十里非如高郵相離稍遠安徽江西隔省者可比書吏如此作奸犯科將正項錢糧

潛米竟敢公然吞蝕書麟僅擁虛位形同木偶朕又安用此總督
爲耶是局郵假印一案書麟尙可稍從末減而句容書吏使蝕銀
米密遞江甯書麟亦竟漫無覺察其罪實與閔鶚元相埒是以昨
降諭旨將書麟革職拏問解交刑部治罪向來各省刑名錢穀事
件總督往往以非其專守委之巡撫兩司而於官員題升調補又
復攬爲己職獨操進退之權及至貽誤廢弛又復借詞推卸殊不
知總督有統轄之職糾吏除奸徵漕納課皆應留心整飭豈總督
坐享高爵厚祿僅令管理兵丁營伍遂可謂無負厥職耶書麟閔
鶚元平日皆尙能辦事爲督撫內之中上者故朕特加倍任用恩
遇優隆乃不料伊等竟如此玩誤地方於民生休戚漠不相關負
朕倚任深恩則其餘中下督撫又安能使朕委任無疑乎是不但
於大吏難以倚信卽朕亦將無以自信矣朕不僅爲書麟閔鶚元

愧而朕無知人之明亦且自引以爲愧於此益信爲君之難今年爲朕八旬壽辰普天同慶若四方無事朝野乂安而官吏等皆知大法小廉奉公盡職朕豈不樂坐慶昇平延洪申錫乃地方官舞弊營私而封疆大吏復爲之庇護瞻徇今旣破露又安得置之不問朕於臣工過戾事或因公卽尋常之時亦且加之寬恤甯有際此共球畢集薄海臚歡爲史冊罕觀之會而於倚任大臣反有所苛察乎但因慶洽昌期止以受禧稱祝爲樂而於有干法紀之事亦復稍事姑容則國計民生致滋叢脞豈仰體 上天嘉佑朕躬敘福錫民之意况此次舉行慶典止因中外大臣諄詞籲懇不得已勉從所請原非朕之本懷朕之所慶者惟在雨暘時若吏治民康以期共躋斯民於仁壽之宇而不在華祝衛謳之虛美此可告之天下臣工者若內外大小臣工以本年爲朕慶祝之辰卽身獲

愆尤可以仰違曲恕遂爾意存憐恕不思奉法急公則是自貽伊
戚朕必不肯因舉行慶典稍存姑息也朕臨御五十餘年代 昊
蒼惠養兆民孜孜不倦今距歸政之期尙有五載朕惟有日慎一
日以飭紀整綱爲先務而敦幾兢業健行不息之精神必較從前
治益求治以貽萬年無斁之休朕以此教子孫及內而閣部九卿
外而督撫藩臬俱當以朕之心爲心朕之政爲政各矢恪誠共襄
郅治但外省督撫見朕治一貪污之吏憊一廢弛之員當時未嘗
不稍自儆惕及至事過輒忘惟知養尊處優安享豐膺全不以勤
求民瘼激飭官方爲事此等錮弊相習成風自罹法網而不知悔
朕甚憫焉著通諭督撫等將此旨各敬錄一通揭之堂楣入於交
代俾得觸目儆心時加澣滌咸臻廉法以副朕諄諄勉勵教誠成
全至意○乙卯諭廣西巡撫孫永清見在病故所有任內降革罰

俸處分俱著加恩寬免○諭英善奏孫永清見在病故廣西巡撫員缺請旨簡放等語因思陳用敷前在安徽巡撫任內於學政徐立綱聲名平常未能據實參奏是以降爲奉天府尹用示薄懲但念陳用敷係失察學政獲罪非辜麟閣鷺元之玩視民瘼袒庇徇私者可比陳用敷著加恩補授廣西巡撫並令前來行在請訓後卽赴新任陳用敷未到任之前所有廣西巡撫印務卽著英善護理○大學士等奏審訊高郵州書吏假印冒徵及有意彌縫之各該管撫司等定擬治罪一摺得旨閔鶚元著從寬改爲應斬監候秋後處決吳瑛依擬應絞著監候秋後處決康基田著從寬發往軍臺效力贖罪其起意爲首假印誑騙之林之佩夏瑄係書吏舞弊著卽依擬處斬○丙辰敕封安南國王阮光平長子阮光纘爲世子制曰朕惟一人宅中馭外化覃屬國之封列辟守典承庥佑

啓克家之胄稟華方於夙夜念篤尊親知大德之生成情徵愛戴
用沛宗藩之懋賞特昭曠格之殊恩維安南遠介炎荒而國王恪
遵臣職藩邦新造承家緜弗祿之長崇爵初膺篤祐遂就瞻之切
表奎嶺懇贊獻情殷際普天同慶之辰欣躋壽域效薄海臚歡之
頌共暢皇風云嘉令器象賢更喜稚城宗子爾阮光績迺安南國
王阮光平之家嗣粹質溫醇英姿瑰特聽鶴鳴之陰和聿培蘭玉
生成當經訓之親承快覩荆枝首茁詒燕翼而鎮撫有方震爲長
子譽龍光而箕裘克紹胥叶康侯有嘉德而裕及後昆故推恩而
賞延奕世今封爾爲安南國王世子錫之敕命於戲爾自葉以流
根如橘如梓材由斲而塗塿肯構肯堂儀文特賁爾榮典冊載綏
爾寵爾其在家思孝在國思忠勵適心於匪懈學爲人臣學爲人
子修厥業以無愆允不厭夫芳聲並懋承乎多祉欽哉毋替朕命

○戊午諭軍機大臣等昨因熱河道府面稟軍機大臣接到沿途傳單供應阮光平等尖宿一日約用銀四千兩阮光平到熱河後一切供支是否照沿途辦給軍機大臣以阮藩到此瞻覲已奉旨令膳房供給飯食務須豐盛若沿途已格外加豐此處似不便從簡又難再有加增面奏請旨阮光平以新附外藩額請親自祝釐情詞肫懇是以俯准所請並令於經過省會地方酌加宴資豐儉適中以示體恤乃入江西境後每日尖宿供應卽需用銀四千兩之多則其餘宴資舟車夫馬等費更無所底止矣前據福康安奏阮光平於廣西甯明州坐船前進給與米麪肉斤等物令其自爲烹飪則經由陸路每日亦不過供應肉菜又何須一日用銀四千兩卽遇省城筵宴亦不至如此多費卽如每年朕宴資蒙古王公大臣及各國使臣等所用宴桌每次皆需一百上下用銀亦不過

在一千兩之內福康安曾任內務府大臣久侍內廷素所深知此番筵宴阮藩自未必如年節宴賚之豐此必不曉事之督撫張大其事任聽屬員恣憑踵事增華而地方官亦借此浮冒侵漁將來卽不便開銷亦係通省攤賠與己無涉朕思此事總由福康安籌辦之初未能通盤斟酌又復心存高興以外藩親身入覲爲史冊罕觀之事遂爾稍事鋪張以致江西等省督撫望風承意漸次加增並欲將道路橋梁途間屋宇俱爲修葺粉飾甚至路旁枯木皆行伐去竟如隋朝外藩來覲草木皆衣被文繡而其途中仍不免有凍餒之民爲外夷所笑況省會鎮集地方固屬盈甯繁庶而經過道路縣長亦有鄉野偏僻之處豈能槩爲修飾若被彼窺破轉致貽笑外夷福康安素稱曉事豈見不及此且內地如此逾格優待過事繁華竟似於阮光平有所倖冀故爾不惜多糜國帑極爲

優崇於體制大有闕繫豈有堂堂天朝爲一一荒微藩臣作誇多
關靡供應之舉乎阮光平此次赴闕後自必定以朝覲之期源源
而至若俱如此費用浩繁則極盛難繼國家經費有常伊於何底
再以每日用銀四千兩而計則往來幾及二百餘日需銀八十餘
萬轉不若以此項作軍興之費爲許世亨等復仇大舉矣朕之所
以不用兵於安南者原爲惜帑愛民起見福康安豈尙不知仰體
朕意乎儻此項繁費起自粵西則其過在福康安若起自江西則
其過在何裕城但卽不由粵西而起福康安見沿途如此糜費亦
當一面據實參奏一面密爲曉諭節減方不失爲公正曉事之大
臣計此時阮光平已將抵楚境何以該督漫不加察竟未奏聞耶
且此項虛糜銀兩大半爲地方官花費冒銷或係護送員弁從中
勒索於福康安阮光平皆無實惠况所用之銀旣難於例外開銷

自必在通省官員養廉內攤扣地方官辦公竭蹶勢必仍取之閭閻更不可不防其漸將來眾怨歸福康安矣著福康安卽查明似此遇事糜費之舉從何處而起卽行據實查參毋稍迴護福康安受恩深重亦不至稍有隱飾也○辛酉諭向來滿漢科道相沿前明內升外轉之例徒資夤緣都察院三年題請一次殊爲具文滿漢科道果有才具出眾供職勤慎者京察之年原准該衙門分別保送引見時記名以道府升用或亦時有命各部院保用道府者是升途不至久滯又何用相沿舊例屆期題本徒滋案牘耶嗣後滿漢科道內升外轉三年請旨之例著停止無庸題本○壬戌敕封緬甸國長孟隕爲國王制曰朕惟德孚柔遠王朝隆無外之模忱切嚮風屬國被咸甯之福旣敬將夫職貢無備遐藩宜裒錫以恩綸允綏嗣服龍光斯賁爵命維新爾緬甸國長孟隕地處炎陬

系居支庶曩者家道多難禍亂相尋繼因國賴長君攀援共戴敬
開納賚恪恭著攝立之年降敕頒珍惠愷浹歸仁之感茲以今歲
爲朕八旬萬壽敷天慶洽薄海歡騰額大吏以抒情遣陪臣而祝
嘏先期齋潔葵傾矢在寸心重譯來同琛獻踰乎萬里麻徵所應
施款堪嘉至爾國世裔載延邦基復整干戈是戢期鎮撫夫民人
鍾簞常新思莫安夫土宇憑據虔悃跼蹐藉榮施仰祈封號於天家
支披金葉遠賜詩章於下國寵荷珠光今封爾阿瓦緬甸國王賜
之敕印王其勉修政事慎飭官寮敦輯睦於鄰封垂枚甯於邊境
永受無疆之慶流及子孫益堅不貳之誠保其宗社欽哉毋替朕
命○甲子諭軍機大臣等福崧奏審擬句容縣糧書侵蝕錢糧一
案已批交軍機大臣會同行在法司覆擬速奏矣該撫摺內稱前
任句容縣吳汾提訊時見其人甚平庸兼有疾病上年曾經康基

田等詳請勒休閔鶚元延閣未辦等語知縣有親民之責吳汾才具平庸不能勝任該藩司等既經詳請勒休閔鶚元何又延閣不辦可見閔鶚元諸事玩誤護庇劣員一任地方廢弛其辜恩負職之處種種敗露見在康基田雖准其贖罪尙未出京著留京王大臣監提閔鶚元與康基田質對訊以吳汾若果年力精壯辦事勤幹而康基田挾嫌以該員衰病勒休閔鶚元卽當據實參奏或康基田因勒索吳汾不遂遽爾捏詳勒休閔鶚元尤當嚴參查辦何以緘默不言止將吳汾調任了事將此二層令其當面質對各行據實登答若康基田所詳屬實閔鶚元心存袒護吳汾置之不辨以致縱容該縣書吏作弊侵用銀糧盈千累萬則閔鶚元玩誤之罪更無可追務須質對明確據實覆奏○乙丑諭穆和蘭奏查明每年實欠錢糧覈實奏銷一摺豫省上年地丁雜稅等項未完銀

六十七萬六千餘兩而五十三年亦尙有未完銀十萬三千五百
餘兩此項未完銀兩未必實欠在民卽如江蘇高郵州書吏私雕
假印偽串冒徵百姓胥受其愚而句容縣糧書侵用錢糧盈千累
萬皆係以完作欠歷年吞蝕由此而推可見閭閻受國家百餘年
培養愛育之恩深仁厚澤無不浹髓淪肌窮年力作之餘皆思踊
躍急公輸將恐後而蠹書猾吏等假捏串票任意侵漁使小民急
公奉上之誠轉爲若輩私肥囊橐之計甚而地方官知朕無時不
以惠養黎元藏富於民爲念輒思積欠過多自必蒙恩豁免因而
急於徵催影射入己作爲未完者想亦不少朕臨御五十五年勤
求民隱孜孜不倦凡遇水旱偏災無不先期諮詢重則加恩蠲予
蠲免輕則准其分年帶徵俾窮簷蔭屋咸躋盈甯朕之於民未嘗
不體恤周至乃督撫牧令等旣不能宣達朕意又使書吏從中侵

臣豈得謂尙有人心者乎愚民易於欺虐不受奸吏重徵之累已屬倖免甯有應交正項錢糧敢於遲延觀望耶封疆大吏皆係受朕委任重恩不於此等關繫民生休戚之事盡心稽察則其他更不可問矣嗣後各省督撫等於藩司奏銷之期務須將未完各項是否實欠在民悉心體訪徧行曉諭務使急公之戶不受重徵方爲無忝厥職見在高郵句容二案接踵發覺想各省亦必有似此者俱著徹底清釐毋任官侵吏蝕虧帑累民儻經朕此次諄切曉諭之後尙思通同隱飾希冀掩蓋消弭一經敗露書麟閏鶚元等卽前車之鑒慎毋自蹈覆轍也將此通諭各省督撫知之並令各省將此旨榜示通衢俾咸知朕意○己巳諭軍機大臣等奇豐額奏查抄閏鶚元家人房產摺內稱訊據趙相祝徵萃等供出共有寄存銀二萬一千九百八十餘兩錢二千六百三十餘千田五百

八十畝又據署震澤縣知縣王勸查出該縣地方第八都第九都等處共田一百九畝俱係閔鶚元名下之產恐就近各縣尙有假名置買之田見在密行查訪等語各省大小官吏每年祿精所入積有餘貲置買田產原屬例所不禁卽與富戶等締結姻親亦事所常有但以本省大吏置買本省田產與所屬部民鄉宦富家結親往來實爲大干法紀之事試思巡撫統轄全省一切催徵錢糧等事俱應秉公稽察乃於所屬置買田畝則完糧納稅該縣豈敢實力徵催並有代爲完繳之事皆不可知而紳士富民等倚恃與巡撫誼屬姻親假其聲勢必至包攬詞訟武斷鄉曲其弊更無所不至著留京王大臣監提閱鶚元嚴加訊問此項田畝及與趙相祝徵萃結親若在江甯藩司時已屬牟利犯法若在安徽任內尙可無庸置論如在江蘇巡撫任內則閔鶚元之罪更大見在令奇

豐額檢對契卷年月無難立時查出閔鶚元豈能始終狡飾耶卽使所置田產係在安徽巡撫任內之事調任江蘇後亦應卽時售去於浙江本籍另行置買有何不可並應將與江蘇紳士富戶結親係在安徽任內之處具摺奏明曉諭地方官令親戚等毋得招搖生事向不失爲公正大臣閔鶚元係讀書曉事之人於此等顯而易見之嫌疑竟不思早爲引避利令智昏公然將所置田產自行管業而與紳士富戶等交結往來並寄存銀兩生息實屬顛倒督亂天奪其魄如此亂法孤恩朕用伊爲巡撫多年任其牟利徇情朕亦深以爲愧封疆大吏如此難信朕實爲之寒心至閔鶚元所買震澤縣田契俱係捏名而積存銀兩又分交各處寄匿其居心尤不可問督撫等果自信潔已奉公實心辦事必不萌豫備犯罪之念其豫備此念者必係貪賊壞法之人自知行私作弊積有

厚貲一經敗露必致查抄入官心懷恐懼方行豫爲隱寄親戚假捏姓名希圖查抄時可以遺漏隱匿爲此鬼域伎倆朕可欺天可欺乎再閔鶚元當四十二年正月內來京陛見正值 皇太后大事伊並未過二十七日卽先行出京卽云有旨回任亦當懇辭伊犯事後朕始向軍機大臣等言之據阿桂言是年奉差滇省於正定途次得信後卽日趕回在涿州地方遇見閔鶚元等語阿桂與閔鶚元俱係國家大臣阿桂奉差往滇聞信後並未奉旨卽行馳回可謂識大臣之體而閔鶚元本屬在京其安徽任內有何迫不及待之事乃遽爾回任可見阿桂爲休戚相關之大臣而閔鶚元竟屬全無良心之小人矣十數年來朕因閔鶚元在巡撫中尙屬能事此等大節所關朕欲全其名節不肯宣示今閔鶚元昧良負恩至於此極始將此事明言並著傳諭留京王大臣將以上指出

各情節向閱鄂元嚴加究詢令其逐一登答毋任稍有捏飾○甲戌諭軍機大臣等福康安覆奏阮光平入覲沿途供應事宜恐地方官踵事增華辦差長隨等從中浮冒節飭廣東廣西兩省司道妥行酌議俱係節之又節並移咨沿途督撫一體遵照茲直隸所接傳單如此混開經費殊堪駭異等語所奏係屬公論已於摺內詳晰批示矣此事前據熱河道府面稟軍機大臣朕以爲必起自江西當經降旨諭令直隸河南湖廣江西各督撫及福康安據實查明奏覆節據河南湖廣等省陸續覆奏並無其事而何裕城姚棻尙未奏到卽梁肯堂亦止奏直隸爲入貢通衢一切差務俱有定款不能逾例辦理而於此項傳單係屬接准何省知會之處未經據實聲明今福康安奏粵省議定供應章程並無多費已轉行沿途各處遵照妥辦則此項過事糜費虛開冒銷之弊竟與護送

各員無涉自係承辦供應之員借以爲名任意花用希圖從中沾潤豫存浮冒地步地方官惡習相沿往往如此朕所素知不可不徹底根究查出此項傳單究竟起自何省至傳單內所開直隸尖宿州縣力量難支必須幫貼此項章程自由總辦司道具詳總督定議飭遵則直隸各處所貼銀兩又從何而出若傳單內所定條款古北口以外亦酌定稍爲貼助則熱河道府亦不至賠累過多計無所出可見地方官藉此舞弊冒銷必致終於破露著再傳諭梁肯堂將刊刻傳單直省係照何處之例轉行若非起自直隸一面奏聞一面飛咨河南湖廣江西逐站挨查務使根究到底水落石出不可存顧預了事之見致干咎戾